

DIDZA' GUSÖL-LË'Ë PABLO QUEËBI' BI'I TITO

Pablo rugapë' Dios bi'i Tito

¹ Neda', Pablo, naca' huen dxin queë' Dios, en gubáz nasöl-lë'ë Jesucristo. Gusöl-lë'ë neda' para guna' ga ila'yéajlë' bönachi chigurö cazë' Dios, para ulu'únbë' le naca idútë li ca ral-la' gun nu nunbë' Dios. ² Caní naca' tu' runa' löza uzi'a xibé yöl-la' na'bán idú le guzxi' lu në'ë Dios gunnë' queëru' dza ni'te, cate' si' gusí lo rata' yúgu'të le dë, ate' run cazë' Lë' le nazí' lu në'ë gunë'. ³ Cate' bidxín dza que, Dios bulu'e lahui xtídzë'ë, le gulu'ë lu na'a guna' libán que. Caní gunná bé'enë' Dios, Nu busólá rë'u, neda'. ⁴ Rugapa' Dios li', böcha'ado' Tito. Nacu' idú zxi'ini caza' tu' naca lëbisö ca réajlë'ëru' Cristo. Rinábida'-në' Dios Xuz, en Xanru' Jesucristo Nu busólá rë'u, uzá' ládxë'ë quiu', en huéchi' ládxë'ë li', en gunë' ga soa dxí icja ládxí'do'o.

Dxin queë' Cristo runbi' bi'i Tito luyú Creta

⁵ Que lë ni na' bucá'ana' li' luyú Creta, para usó'o le riyadzaj quégaca bönachi queë' Cristo nacuá' ni', para ilácagaca idú bönachi queë' Cristo, en para ucú'u bönni' gula yúgu'të yödzö para ilún chi'ë bönachi queë' Cristo nacuá' tu tu yödzö ni', ca na' chigunná bé'eda' li' gunu'. ⁶ Nu bönni' gula rapa chi'ë bönachi queë' Cristo ral-la' gáquië': Bönni' cuntu nu bi gaca innë' queë'. Zoa túzinu nigula queë'.

Yugu' zxí'inë' ral-la' ila'yéajlë'ëbi' Cristo.
 Biti' soa nu gaca innë quégacabi' ta'dá dzágasibi' ca',
 o ta'dá'baga'bi' xuz xiná'agacabi'.

⁷ Nu bönni' rapa chi'ë bönachi queë' Cristo run
 bayudxi:

Biti' runë' le gü'i lataj nu bi innë queë' ca runë'
 xichinë' Dios.

Biti' gáquië' bönni' zidi o bönni' icja dza'a,
 o bönni' re'jë', o bönni' ribízxjanë',
 o bönni' rizë ládxì'së' dumí.

⁸ Ral-la' gu'ë ga ila'cu'ë böchì'ru' ta'dxinë' lidxë'.
 Ral-la' së ládxë'ë gunë' le naca dxi'a.

Ral-la' gáquië' bönni' réajni'i, en bönni' tsahui'.
 Ral-la' gádxinë' Dios, en inná be'e cuinë'.

⁹ Ral-la' gun chi'ë didza' idútë li ca chinazëdë',
 para gaca ichízië' icja nágagaca bönachi ca sa'yéaj
 xibá dxi'a,

en para gaca usayjë' rú'agaca bönachi ta'nnë que.

¹⁰ Caní ral-la' gáquië' tu' ta'dá'baguë'ë zián
 bönni', en tu'ë didza' biti' nazaca', en ta'zí' yé'enë'
 bönachi. Zián bönni' tunë' caní nácagaquië' judío.

¹¹ Yugu' bönni' ni, run bayudxi gunu' ga tsayaj
 ruá'agaquië', tu' tunë' ga ta'chixi ta'nigui yúgu'të
 bönachi nacuá' yu'u gapa ta'yázië', en tu'sédinë' le
 cabí ral-la' ulu'sédinë'. Caní tunë' para ila'zí'isë'
 dumí.

¹² Tuë' bönni' gubábë' bönachi Creta ga na' zu',
 bönni' na' bë'ë didza' uláz que yudo' quégäquië',
 gunnë': "Ta'zí' yé'tica'së' bönni' Creta, en
 nácagaquië' ca bö'a gu'a sínia'. Nácagaquië' bönni'
 huágulë'ë xöhuëdi." ¹³ Didza' ni benë' ba nalí
 quégäquië' naca idútë li. Que lë ni na' gudil-la
 légaquië' para gaca idú ca ta'yéajlë'ë Cristo, ¹⁴ en

para cabí ulu'zé nágagaquië' yugu' didza' ridasö quégäquië' bönni' judío, en biti' ilunë' ca ta'nná bë' böñachi nucá'anagaca le naca idútë li.

15 Yúgu'të naca dxi'a quégaca nupa nácagaca dxi'a, pero quégaca nupa nácagaca xihui', en biti' ta'yéajlë', biti' bi naca dxi'a, pero nácagaca xi-hui' ga ridxintë le ta'bequi ícjaguequi, en le ta'zá' láxí'gaca. **16** Ta'nné' núnbë'gaquië' Dios, pero le túngaquië' biti' röjlöz le ta'nné' tu' nácagaquië' bönni' tu'dí'inë' Dios. Ta'dá'baguë'ë xtídzë'ë, en biti' ca' gaca ilunë' le naca dxi'a.

2

Xibá dxi'a le ral-la' usëdiru'

1 Na'a, ral-la' gu'u didza' le röjlöz xibá dxi'a.

2 Busedi yugu' bönni' gula:

Biti' ral-la' ilé'ajë'.

Ral-la' iláquië' ba'a ladxi', en bönni' ta'yéajni'inë'.

Ral-la' gaca idú ca ta'yéajlë'ë Cristo.

Ral-la' ila'dxi'inë' luzá'agaquië', en ila'bözë' zxön ladxi'.

3 Busedi yugu' nigula gula:

Ilunnu le raza ládxë'ë Dios.

Cabí ila'nnënu que luzá'agacanu, en cabí ilé'ajnu.

Ral-la' ulu'sédinu le naca dxi'a.

4 Ral-la' ulu'sédinu' nigula ni' yú'ugacanu iz cuidi' para ila'dxi'inu bönni' que queégacanu, enca' zxi'inigacanu.

5 Ral-la' ilácanu nigula ta'yéajni'inu, en nigula dxi'a ladxi'.

Ral-la' ilún chí'inu le dë lídxigacanu, en ilácanu dxi'a.

Ral-la' ilunnu bal bönni' que queégacanu.

Ral-la' cabí bi ilunnu le güí'i lataj nu inné zi' que xtídzë'ë Dios.

6 Busedi yugu' bönni' ni' nacu'ë iz cuidi':

Ral-la' ilácagaquië' bönni' ta'yéajni'inë'.

7 Ral-la' gúntica'su' le naca dxi'a,
uluí'inu' bönachi caní ca ral-la' ilúngaca.

Ca rusédinu' ral-la' ului'i nacu' idú ladxi', en ba'a
ladxi'.

8 Ral-la' usédinu' didza' dxi'a le cabí gaca nu bi inné
que.

Caní gunu' ga utuí'inë' bönni' ridá'baguë'ë,
en biti' gaca bi inné' queëli' runli' le ruá' dö'.

9 Busedi böchi'ru' ni' ta'yéajlë'ë Cristo, en
nadó'ogaquië':

Ral-la' ila'cu'ë nöxaj lógaquië' xángaquië'.

Ral-la' iluné' yúgu'të le ila'yaza ládxí'gaquië'
xángaquië'.

Biti' ral-la' tá'baga'gaquië' le ta'nná bë'ë.

10 Biti' bi ulu'cáchil'anë'.

Ral-la' ulu'lui'i cuíngaquië' tsahui' ca naca yúgu'të
le tunë'.

Caní uluí'i lo naca dxi'a xibá queë' Dios, Nu busölá
rë'u.

11 Cristo, bönni' na' buzá' ládxë'ë Dios queëru'
chibulu'i lahuë' lógaca yúgu'të bönachi para
ulu'lágaca. **12** Lë' rusédinë' rë'u ucá'anaru' le cabí
raza ládxë'ë Dios, en cabí së ládxí'ru' le naca que
yödzölió ni, pero cözaru' zxön ladxi', en gácaru'
tsahui' dza ni zóaru' na'a, en gunru' ca rë'ëni
quézinë' Dios. **13** Ral-la' cözaru' le runru' löza le
gun ga gácaru' bica' ba, lë na' gaca dza ni' cate'
uluí'i lahuë' Jesucristo lu bení' idú queë'. Náquië'
Dios zxön, Nu rusölá rë'u. **14** Lë cazë' budödi cuinë'
uláz queëru', para böá'uë' rë'u lu yúgu'të le naca

xihui', ate' ruúnë' rë'u tsahui' para gácaru' bönachi queë', en güí'i ládzi'ru' gunru' le naca dxi'a.

¹⁵ Yugu' lë ni bë' didza', en guchiza icja nágagaca bönnachi ni', ate' len yöl-la' unná bë' gudil-la léguequi. Béntica'sö caní, para cabí si' lataj nu ucá'ana cá'asö xtídz'u.

3

Le ral-la' ilún bönnachi ta'yéajlé' Cristo

¹ Busá' ládzi'gaquië' böchi'ru' ni' ilunë' ca ta'nnë' bönni' dë lu ná'agaquië', en bönni' yúlahui', para ilunë' ca rnna xtídz'gaquië'. Ral-la' ila'cu'ë sina' ilunë' le naca dxi'a. ² Biti' bi le ruá' dö' ral-la' ila'nnë' que luzá'agaquië', en biti' ila'díl-lalenë' légaquië' didza', pero ral-la' ilácagaquië' nöxaj ladxi', en idú ladxi' lógaca yúgu'të bönnachi.

³ Lësca' rë'u, zí'alö gúcaru' yugu' bönni' biti' ta'yéajni'inë', en gudá'baga'ru' Dios. Gudaru' nanítiru', en gúcaru' ca nupa nadó'ogaca, tu' benru' le guzé ládzi'ru' le ruá' dö', en ia'bal-la le guyaza ládzi'ru'. Benru' ca' le ruá' dö', en buzxé'eru' luzá'aru'. Biti' bila'lé'e bönnachi rë'u dxi'a, ate' rë'u biti' bilé'eru' dxi'a luzá'aru' turu' ia'turu'. ⁴ Ní'irö bulu'e lahui Dios, Nu rusólá rë'u. Naca bë' náquië' idú dxi'a, en nadxi'inë' yúgu'të bönnachi, ⁵ tu' busölé' rë'u, calëga tu' zoa bì le naca dxi'a benru' rë'u, pero tu' buéchi' ládxë'ë rë'u. Bunë' rë'u dxi'a, en benë' ga nácaru' bönnachi cubi. Dios Bö' Lá'ayi rucubë' rë'u. ⁶ Dios gusól-lë'ë Dios Bö' Lá'ayi queëru' tu' néquiru' queë' Jesucristo, Nu rusólá rë'u. ⁷ Buzá' ládxë'ë queëru', en bunë' rë'u tsahui' para gata' yöl-la' na'bán idú queëru', le runru' löza gunné' queëru'.

⁸ Didza' idútë li lë ni nuzúaja' lu guichi. Ré'ënda' usédide'enu' yugu' bönni' ni' yugu' lë ni para ilu'i ládx'i'gaquië' ilúntica'së' le naca dxí'a tu' ta'yéajlé'ë Dios. Lë ni naca dxí'a, en nácdada' lesaca' ila'zí' lu ná'agaca yúgu'të bönnachi. ⁹ Na'a, biti' gu'u lataj nu gü'i didza' le cabí nazaca', o nu gü'i ladxi' ca nácagaca lágaca ziántérö cö' xuz xtó'ogaca bönnachi, o nu tsöjgutsa' yugu' didza' bizzaj, en yugu' le ridilla didza' ca naca que xibá queë' Moisés, tu' cabí bi nazáca'gaca le caní, ate' cuntu nu uzi' xibé didza' caní.

¹⁰ Channö zoa nu bönni' ni', rubéajë' choplö bönnachi queë' Cristo, tödi usó'o ládxë'ë tu ia'tú luzuí, bubéajë' bönni' na'. ¹¹ Nöz quézinu' chiböáquië' caní nu bönni' biti' náquië' tsahui', en runë' dul-la'. Chinabáguë'ë xíguia' ni'a que lë na' runë'.

Le buzúajë' Pablo lu guichi le gunbi' bi'i Tito

¹² Cate' isöl-la'a-në' Artemas o Tíquico ga zu', bë' ladxi' guídu' ga ni zoa' lu yödzö Nicópolis, tu' chinuna' quia' ugá'ana' ni yugu' beo' ziaga.

¹³ Zenas, bönni' na' rudo'dë' didza' ca rinná bë' bönnachi yúlahui', enca' Apolos, ila'dxinë' ga ni' zóali'. Bugú'u légaquië' nöza lu yöl-la' rácalen, para cabí bi yadzaj quégäquië'. ¹⁴ Busedi yugu' böchi' luzá'aru' ilúntica'së' le naca dxí'a, en bi ulu'nödzejë' quégaca nupa bi riyatdazaj quéguequi, para gaca bë' caní le nácagaquië' queë' Cristo.

Pablo rugapë' Dios bönnachi queë' Cristo

¹⁵ Yúgu'të nupa nacuá'len neda' tu'gapa Dios li'. Bugapa Dios nupa ni' nadxí'igaca rë'u tu'

ta'yéajlë' Dios. Le ruzá'ládxë'ë Dios queéru' gácalen
yúgu'tëli'. ¡Ca' gaca!

**Didza' cubi rucá'ana tsahui'
New Testament in Zapotec, Rincón (MX:zar:Zapotec,
Rincón)**

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

58bf86df-ae22-508c-81dc-936dbf138c25